

**TEZĂUR LITURGIC**  
**2 OCTOMBRIE**

**ACATISTUL**  
**SF. CUVIOS**  
**TEODOR II**  
**UȘAKOV**  
**DE LA**  
**SANAKSAR**  
**III**



**MOSCOVA, 2000**



# Акафист святому праведному воину Феодору Ушакову

## Кондак 1

Избранный воине Царя Небесного и воеводу  
Державы Российския, святой праведный  
Феодоре, мы, яко единовенные твои, от всея  
души Тя ублажаем, ты же от всех бед и скорбей  
нас свободи и страну твою сохрани, воинство ея  
укрепи и всех нас в Православии утверди, да  
зовем Ти:

радуйся, святой праведный Феодоре,  
архистратиге Державы Российския!

## Икос 1

Ангелов Творец избра Тя, святой праведный  
Феодоре, к воинскому служению Державе  
Российской, темже и утверждение стране нашей  
явился еси и Отечеству похвало, мы же,  
единовеннии твои, ублажаем Тя сице:

радуйся, праведного рода отрасль пречестная,  
радуйся, благочестивых родителей достойный  
плод,

радуйся, армии Державы Российския  
утверждение,

Радуйся, врагов ея устрашение,

радуйся, флота ея непоколебимое основание,  
радуйся, благочестивых христиан увеселение,  
Радуйся, святой праведный Феодоре,  
архистратиге Державы Российския!

## **Кондак 2**

Видяще люди земли нашея Твое верное  
Российской Державе служение и благочестие  
непоколебимое, милосердие неистощимое, не  
токмо к сослуживцам и единоверцам, но и  
врагам являемое, познаша Тя праведника быти,  
вопяше о Тебе Богу: Аллилуйя!

## **Икос 2**

Разум свой к Богу устремив, данный Тебе  
Подателем всех благих дар на служение Богу и  
близким отдал еси, тем же вверенный Тебе  
талант обильно умножил еси, не токмо усердие,  
но и жизнь свою в дар Творцу и ближним  
принося. Тем же ублажаем Тя званиими сими:  
Радуйся, воевод русских добрый наставниче,  
Радуйся, Воинства Российского похвало,  
радуйся, варваров побеждение,  
радуйся, русских воинов соблюдение и  
сбережение,  
Радуйся, начальства доброго в России  
утверждение,  
Радуйся, Державы нашея и армии ея во всем  
благое поспешение.

Радуйся, святой праведный Феодоре,  
архистратиге Державы Российския!

### **Кондак 3**

Силою, данною Ти свыше, не токмо славный  
воеводо явился еси, но и милосердия творец  
изрядный, воистину воинам своим вместо  
родного отца быв, наставляя всех верных  
вопити Богу: Аллилуйя!

### **Икос 3**

Имеяше воистину, святой славный воине  
Феодоре, с Небесе похвальная подвигам Твоим  
пети, а не от земли. Чудеса мужества являя,  
воистину славный архистратиг явился еси,  
врагов плотских и бесплотных посрамляя. Темже  
вопием Ти сице:

Радуйся, доблести Феодора Стратилата  
подражавый,  
радуйся, о благополучии Державы Российской,  
яко и Георгий Победоносец славный, радевый,  
радуйся, в ревности Дмитрию Солунскому  
последовый,  
радуйся, силу сподвижника его Нестора  
стяжавый.

Радуйся, Александра Невского верный  
последователю,  
радуйся, Дмитрия Донского усердный  
споспешниче.

Радуйся, святой праведный Феодоре,  
архистратиге Державы Российския!

#### **Кондак 4**

Буря недоумения смущает ми ум, како достойно  
есть пети подвиги Твоя, всехвальный воине  
Феодоре. Равен бо во бранех Царям Давиду и  
Константину явился еси, полки нечестивых  
милостью Божией побеждая и силу их  
посрамляя. Темже все вернии вопиют о Тебе  
Богу: Аллилуйя!

#### **Икос 4**

Слышаша, славный воине Феодоре, величие  
подвигов Твоих, весь православный мир зело  
возрадовашася, видя в Тебе могучего защитника  
Православия. Темже ныне Тя, прославленного в  
лике Святых, ублажаем званиими сими:

Радуйся, армии Российския небесный  
Покровителю.

Радуйся, славный во бранях воителю.

Радуйся, воеводо непобедимый,

Радуйся, победоносче нарочитый,

Радуйся, Православия поборниче,

Радуйся, России чудный защитниче.

Радуйся, святой праведный Феодоре,  
архистратиге Державы Российския!

## **Кондак 5**

Плавающим по бурным волнам жития сего подобно неугасимому маяку явился еси, святой праведный воине Феодоре, не токмо во дни бурь и битв, но и в различных жизненных обстояниях сохраняя от бед и злых обстояний всех, вопиющих Богу: Аллилуйя!

## **Икос 5**

Слышаша и введуще, великий наш заступниче Феодоре, твое милосердие, нищии и обездоленные притекаху к Тебе, чая милости от Тебе улучшить. Темже, како во дни земного Твоего жития, никто же от Тебя тощ и неутешен отъиде, тако ныне и нас, в добродетели убогих, своим заступничеством не остави, вопиющим Тебе сице:

Радуйся, немощных заступление,  
Радуйся, скорбящих утешение,  
радуйся, нуждающимся помощи,  
Радуйся, заступниче вдов и сирот,  
Радуйся, православных прибежище,  
Радуйся, от неверных их защищение.  
Радуйся, святой праведный Феодоре,  
архистратиге Державы Российския!

## **Кондак 6**

Проповедует мир весь православный Тя, воине Христов Феодоре, яко скорого избавителя от

всякого злого обстояния душевного и телесного. Ты, во дни земного поприща своего, не попустил ни единому из Твоих воинов пленену быти и ни единому кораблю и начальствующему Твоему погибнути, и ныне, на небесех предстоя, молиши избавити от плена вражеского всех, вопиющих Богу: Аллилуйя!

### **Икос 6**

Возсиял еси свет животный всем, на помощь Твою надеющимся во бранях православным. Ты, чудеса мужества в земных битвах являя, не попустил славы Державы Российской поруганой быти. Темже, егда нашествие иноземное двенадесять язык, грех ради наших, на страну Православную бысть, Ты пророчествовал: «Не отчаивайтесь! Сии грозные бури обернутся к славе России!» Тем же все православные зывают Тебе:

Радуйся, воине Российский неустрашимый!

Радуйся, Архистратиге Державы Российския Непобедимый!

Радуйся, иноземных супостатов обличителю и посрамителю!

Радуйся, нашествия их поражения предсказателю!

Радуйся, славный во бранях поборниче!

Радуйся, защитников наших защитниче!

Радуйся, святой праведный Феодоре,  
архистратиге Державы Российския!

### **Кондак 7**

Хотя защитником верным Земли Русской и веры  
Православной быти, всю жизнь свою отдал еси  
на служение Державе Российской, воистину  
верным слугой ея быв. Темже весь  
православный мир ублажает Тя, взывая о Тебе  
Богу: Аллилуйя!

### **Икос 7**

Новым покровителем, устройтелем и  
архистратигом Державы Российския, ее армии и  
флота явился еси, всехвальный воине Феодоре.  
Сия добре введуще, ублажаем Тя званиими сими:  
Радуйся, флотоводец всех времен преизрядный,  
радуйся, воеводо России предивный,  
Радуйся, страны Российской рачителю,  
радуйся, во бранях воинству русскому славный  
помощниче и защитителю,  
Радуйся, силы Русския Земли явный  
проявителю!  
Радуйся, славы Родины нашея во всем мире  
славный проповедниче!  
Радуйся, святой праведный Феодоре,  
архистратиге Державы Российския!

### **Кондак 8**

Странное и великое чудо показа на Тебе  
Господь: Ты, и малое число воинов и орудий  
имея, велие поражение супостатам земли  
Российской наносил, токмо на помощь Божию  
уповая и злочестие врагов посрамляя, заставляя  
всех верных вопити о Тебе Богу: Аллилуйя!

### **Икос 8**

Весь еси всем помощник и заступник явился  
еси, славный воине Феодоре, не токмо  
православным, но и врагам милости образ  
явился еси, делом христианское благочестие  
показуя. Темже мы, милосердием Твоим  
побеждаеми, вопием Тебе сице:  
Радуйся, милосердия источниче,  
радуйся, страждущим помощниче,  
Радуйся, немощных покровителю,  
Радуйся, от наглыя смерти избавителю,  
Радуйся, добродетелей изрядный образе,  
Радуйся, бездна милости и щедрот.  
Радуйся, святой праведный Феодоре,  
архистратиже Державы Российския!

### **Кондак 9**

Всяких бед и болезней избавитель явился еси,  
славный праведный Феодоре, не токмо о чем же  
своем помышляя, но и все свое имение на  
служение ближним расточая, всем

начальствующим пример служения Богу и ближним подал еси. Темже подвизаеши всех верных благодарно о Тебе Богу взывати: Аллилуйя!

## **Икос 9**

Витий суемудренных и начальствующих века сего посрамляеши, всехвальный воине Феодоре, яко не токмо стяжание, но и жизнь свою на служение Богу и ближним полагал еси. Сего ради все верные сыны Отечества Твоего земного благодарно вопиют Ти:

Радуйся, в милосердии Святителю Николаю подражавый,

радуйся, в ревности подобный Святителю Спиридону бывый.

Радуйся, мощи их благоговейно лобызавый и носивый,

Радуйся, делам их милосердия последовый,

Радуйся, благочестию их подражателю,

Радуйся, славный их в земле Российской помощниче,

Радуйся, благословение сродника своего преподобного Феодора получивый,

Радуйся, молитвы его, яко славное ограждение во всех обстояниях, имевый,

Радуйся, святой праведный Феодоре, архистратиге Державы Российския!

## **Кондак 10**

Спасти хотя всех пасомых, славный защитник всех подчиненных явился еси, святой славный воине Феодоре, не токмо от смерти во бранех, но и от всяких бед, болезней и плена их сохраняя, темже не токмо они, но и их ближнии и знаемые, и мы, грешнии, о Тебе вопием Богу: Аллилуйя!

## **Икос 10**

Стена еси всем православным воинам, святой праведный Феодоре, славное заступление Твое. Аще бо телом и представился еси от нас, отче Феодоре, и душой на Небеси, предстоя Богу, достойно веселишися, но мощей твоих рака перед очима нашими предстоит, подвизая пети Тебе сице:

Радуйся, всем православным во бранех скорый помощниче,

радуйся, страны Российской славный

Заступниче,

Радуйся, щите несокрушимый всем за правду воителям,

Радуйся, всемогущый их покровителю,

Радуйся, нравов благих насадителю

Радуйся, нечестия обличителю и искоренителю.

Радуйся, святой праведный Феодоре,

архистратиже Державы Российския!

## **Кондак 11**

Пение у раки мощей Твоих, праведный воине Феодоре, никогда же оскудевает: все бо страждущие и алчущие правды, о Державе Российской болезнующие и блага ее взыскующие, вседушно к ней притекают. Тем же никто же от Тебя тощ и неутешен отыде, но всем в сладость быти славное заступление Твое. Сего ради вопием о Тебе Богу: Аллилуйя!

## **Икос 11**

Яко на стену тверду и несокрушиму надеемся на ходатайство Твое пред Христом Богом нашим, святой праведный Феодоре. Темже, упование наше на предстательство Твое возложив, вопием тебе сице:

Радуйся, верно служащим Державе Российския покрове и помощи!

Радуйся, пред Богом о них пресильный ходатаю!

Радуйся, заступниче земли Российския Богом данный!

Радуйся, всякого нечестия в ней истребителю!

Радуйся, всех в России благих устройтелю!

Радуйся, до Страшного Суда Христова о ней пред Богом Ходатаю!

Радуйся, святой праведный Феодоре, архистратиже Державы Российския!

## **Кондак 12**

Благодать, данную Ти от Бога, помогать всем пекущимся о благе Державы Российския, ведают вси православнии, святыи воине Феодоре. Темже, на милостивое твое защищение упование возложив, вопием Богу: Аллилуйя!

## **Икос 12**

Поюще Твое славное заступление, святыи праведный воине Феодоре, вседушно Тя восхваляем. Всяк бо положивый на сердце верно служить Державе Российской и Святой Православной Церкви верное защищение в тебе обретает. Сего ради мы, младшии братия Твои, верно вопием Ти:

Радуйся, щите армии Российския несокрушимый!

Радуйся, меч в бранях воинам ея непобедимый!

Радуйся, страны Российския надеждо и ограждение!

Радуйся, Православия в ней утверждение!

Радуйся, всех православных упование непоколебимое!

Радуйся, ходатай мощи Державы Российския непобедимыя!

Радуйся, святыи праведный Феодоре, архистратиже Державы Российския!

## Кондак 13

О, святой всехвальный воине Феодоре, похвало и утверждение Державы Российския, всем приходящим и обращающимся к тебе скорый помощниче! Помози нам в многоскорбном сем житии и како во дни земного поприща Твоего всем страждущим, помощи Твоея просящим и верно служащим России помощник явился еси, так и ныне не остави нас, уповающих на Тя, помози бурные волны моря жития сего без порока прейти и достигнути селений райских, поя с Тобою и со всеми Святыми Подателю всех благ: Аллилуйя!

Сей Кондак глаголи трижды, затем Икос 1 и Кондак 1



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

**І**

**НУЖЕ  
НЕБО**